

Codotenteidi **inānite Pabodo nānō cadota ante** **yewæmongainta**

Waa quēwencæminimpa, ante

¹ Wængonguī angā ēñēninque Itota Codito botō imote da godongā gogaīmo inte botō Pabodobo inōmo inte yewæmōmopa. Mōnō tōniñacā Tīmoteo tōnō guēa tedete ate botō, Acæminimpa, ante yewæmōmopa. ² Mōnitō tōniñamīni ēñēdāni. Codota iñōmō quēwēninque Wængonguī quimīni inte mīnitō mōnō Codito nempo quēwēninque ædæmō cæte pōnēmīni iñōmīnite botō iīmaī ante yewæmōmopa. Mōnō Mæmpo Wængonguī tōnō mōnō Awēnē Itota Codito waadete pōnō cæda ænte entawēninque mīnitō gānē pōnēninque watapæ quēwencæminimpa, āmopa.

Nē pōnēnāni beyæ Pabodo Wængonguī ingante apænecā

³ Mōnō Awēnē Itota Codito Wæmpocā iñongante mōnitō mīnitō beyæ ante apænedinque Wængonguī ingante waa ate pōnente apænemōnīpa. ⁴ Edæ, Mīnitō Itota Codito ingante wede pōnēmīni imīnīpa, ante do ēñēmōnīpa. Ayæ, Wængonguī quīnāni inānite tōmānāni inānite mīnitō waadete pōnēmīnīpa, ante mōnitō do ēñēmōnīpa. ⁵ Edæ, Öönædē æidinque mīnitō watapæ quēwenguinque impa, ante edæ Codito do badongampa. Mānōmainō ante, Nāwangā impa, ante watapæ mīni ēñēnō ante mīnitō godōmenque

wede pönēmīni badinque godongāmæ waadete pönēmīni imīnīpa. Īnīnque, Mīnitō mǎnōmaī imīnīpa, ante adīnque mōnitō wæætē Wængonguī ingante waa ate pönēnīnque apænemōnīpa.

⁶ Doyedē mīnitō weca ponte apænedīnque mōnitō, Mōnō Codito ingantedō ante watapæ apænemōni ēñēnīnque mīnitō, Wængonguī nāwangā waadete pōnō cæcampa, ante do ēñēmīnitapa. Mǎnōmaīnō ante mīni ēñēnīōnæ incæ mīnitō waincawæ nanguī incawæ baī tæcæ badīnque ñowo ganca nanguī apænemīni ēñēnīnque wadāni mīnitō weca nē pōnēnāni tæiyænāni badānīpa. Ayæ tæiyænāni badāni baī mōnō pōnencabo adobaī tōmāmæca tæiyæmō pōni bamōmpa. ⁷ Epapada mōni nē waadedongā incæ, Codito waa pōni nānō pōnō cægāinō ante do odōmonte apænecā ēñēmīnitapa. Tōmengā iñōmō Itota Codito beyæ nē cæcā īnongā inte mōnō imōnite pōnēnīnque ædæmō cæcā ingampa. ⁸ Ayæ mōnitō imōnite apænedīnque tōmengā, Codotenteidi iñōmō Wængonguī Ōnōwoca nempo quēwēnīnque nē waadete pōnēnāni īnānīpa, ante do apænecā ēñentamōnīpa.

⁹ Mǎnōmaī beyæ mōnitō, Mīnitō æbānō imīnī, ante tæcæ ēñēnīnque mīnitō beyæ ante Wængonguī ingante apænedīnque ñimpo cædāmaī inte cōwē apænemōnīpa. Edæ, Wængonguī æbānō angāā, ante mīnitō ēñente ēwocacæmīnīmpa, ante mōnitō, Wængonguī ēñēmi. Bitō ēñēnō ante apænebi ēñente ēwocadīnque Codotenteidi wæætē, Æbānō waa cæte quēwēnguī, ante ēñencædānīmpa, ante apænemōnīpa. ¹⁰ Wængonguī apænecā ēñēnīnque mīnitō, Mōnō Awēnē tocæcāimpa, ante cædīnque

tömengä nänö waa cädö bai mīnitō adobai waa pōni cæcæmīnīmpa, ante apænemōnīpa. Ayæ Wængonguī ingante mīnitō doyedē æmæ ate bai æmæ pōnēnīmīni inte ñōwo wæætē ædæmō ate bai ædæmō pōnencæmīnīmpa. Ayæ waa incawæ bai mīnitō adobai bate cædinque nō mīni waa cæquēnēnonque cæcæmīnīmpa, ante apænemōnīpa. ¹¹ Wængonguī ñāō ēmōnīnque tæ pīñænongä inte pōnō cæcä ate mīnitō edæ tömengä nänö tæi pīñænō bai adobai tæi pīñæmīni ēwocacæmīnīmpa, ante apænemōnīpa. Ayæ, Tömengä mänōmaī pōnō cæcä ænte ēwocamīni inte mīnitō wæntæye badāmaī inte ee cædinque piyænē cæte ee cæcæmīnīmpa, ante ämōnīpa. Ayæ watapæ todirique, ¹² mīnitō mōnō Mæmpo ingante waa ate pōnēnīnque apænecæmīnīmpa, ante mōnitō Wængonguī ingante apænemōnīpa.

Edæ Wængonguī quīmōni imōni bai tömengä mīnitō imīnite pōnō badongä ate mīnitō tömengä quīmīni do bamīnīpa. Inīnque mīnitō tömengä ñāō ēmōmämodē mōnitō tōnō godongāmæ pōñōmīnite tömengä nanguī pōni pōnongä ænīnque mīnitō mōnitō tōnō godongāmæ nē ēamīni incæmīnīmpa. ¹³ Edæ nē wēmō ēnempodongä nempo wæwēñōmonte Wængonguī wæætē mōnō imonte gä pe æmpote ö ænīnque, Botō Wengä botō nē Waadedongä iñōmō nē Awēnē Odeye iñongante mīnitō tömengä nempo quēwencæmīnīmpa, ante māmongä pongamōīmpa. ¹⁴ Tömengä Wengä nämä wepæ petæ petæ wææ beyænque mōnō wænæ wænæ cægainō ante Wængonguī pōnō ñīmpo cæcä ænīnque mōnō abæ tawænte bai quēwēmōmpa.

Codito wængä beyænque Wængongui piyænë cæcampa

15 Mönö adāmaï ingaingä Wængongui æbänö ëmongää, ante adāmaï iñömonte Wængongui Wengä iñömö Mæmpocä bai nē ëmongä inte mönö weca pöningue, Mæmpocä æbänö ëmongää, ante do odömongacäimpa. Wëñëñedë Wængongui nänö badönämaï ingäñedë adocä incæ Bamoncadengä bai inongä inte do quëwengacäimpa. 16 İninque Mæmpocä pönö angä ëñëningue tömengä Wengä incæ tömancoo edæ badongacäimpa. Mönö nē adincoo incæ mönö adāmaï incoo awëmö ongoncoo incæ adocä tömancoo badongacäimpa. Awënëidi incæ nē änäni incæ, awënëidi nāni ënempodö incæ nē tæi piñænāni incæ, öönädë owodönāni incæ inguipoga quëwënönāni incæ mänināni edæ tömänāni inänite Mæmpocä pönö angä ëñëningue Wængongui Wengä iñömö badongacäimpa. Badöñongante Wæmpocä, Bitö qui bacäimpa, angä Ao ante badongacäimpa. 17 Adocä Wængongui Wengä incæ Tānocä quëwengaingä ingampa. Tömengä pönö angä beyænque tömengä nänö badongaincoo iñömö adoyömö pönente bai cædinque tömengä nempo godongämæ gongænte cægompa.

18 Ayæ tömengä nē Önoncamö bai nē angä iñongante mönö tömengä ingante mönö godongämæ pönencabo wæætë tömengä tönö adoyonque bai inömö imompa. Adocä tömengä nänö Tæiyæ Awënë baquinque nē badongaingä inongä inte tānocä pöni ingacäimpa. Ayæ æmonga pöni nänö ongonguinque tömengä wænte ate tānocä nē ñāni ömæmongaingä inongä ingampa.

19 Edæ, Botö entawënö incæ botö Wengä tömänö entawencæcäimpa, ante pönö cædinque Mæmpocä iñömö nanguï togacäimpa. 20 Ayæ tömengä Wengä wepæ awäa gowete wædinque wængä beyænque Wængonguï mönö tömämö beyæ pönö cædinque piyænë cægacäimpa. Tömengä Wengä tönö mänömaï pönö cæcä beyænque mönö inguipoga tömäo quëwëmö tönö öönædë tömäo quëwënäni tönö tömengä ingante Ao äninque tömengä tönö godongämæ piyænë cæte quëwëmö adinque Wængonguï iñömö nanguï togacäimpa.

21 Ayæ mīnitö guiquënë Wængonguï ingante näwæ pämänte gogaïmīni inte wiwa cædimīni inte ocaidë nē piinte bagaïmīni iñömīnite, 22 Wængonguï wæætë, Adocä Codito tömengä baö ëwënente wængä beyænque mīnitö botö quimīni badinque botö ayömo tæiyæ waëmö entawencæmīnīpa, ante cæcampa. İninque tömengä ñä mēnongacä ate mīnitö tömengä ayongä wentamö mongænämäi imīni adinque, Wënæ wënæ cæbitapa, ante ædö cæte piinte anguü. 23 Edæ mīnitö tæi mænonte bai ongöninque do mīni wede pönēnonque ante cōwë godömenque pönēmīni İninque tömengä weca ponte ongömaïmīnīpa. Mönitö mönö Codito ingantedö ante mönö pönēnö beyæ mönö watapæ bacäimpa, ante apænemöni ëñēmīnitawo. Mänīne ante ñimpo cædämaï imīni inte mīnitö tömengä weca cōwë ongömaïmīnīpa. Mänīne mīni ëñēnīne ante mönitö ñöwo inguipoga tömäo quëwënäni inänite apænemöni ëñēnänīpa. Mänīne beyænque ante botö Pabodobo nē cæbo batabopa.

Mönö pönencabo beyæ botö nē cæbo batabopa,

ante

²⁴ Mīnitō beyæ nanguī cædinque nantate wæðimo incæte botō nanguī tobopa. Ayæ Codito beyæ ante godōmenque wæquēnēmō inte botō tōmengä tönō guëa baonque nantate wæbopa. Codito mōnō Ōnoncamō bai nē angä iñongante mōnō tōmengä ingante mōnō godongämæ pōnencabo iñōmō tōmengä tönō adoyonque bai imopa. Botō iñōmō edæ mōnō cabo beyænque caate wæbopa. ²⁵ Ayæ, Codito ingante nē pōnēnāni beyæ bitō nē cæbi badinque botō angäine ante adodō adodō ante tōmänō ante edonque pōni apænebi eñencæðänimpa, ante Wængonguī angä eñēninqe botō mīnitō beyæ nē cæquēnēmo do bagaboimpa.

²⁶ Mänīne Wængonguī nänō angäine ante wantæpiyæ wē wodonte bai iñonte mōnō mæmæidi cōwē eñēnāmaī ingadänimpa. Ñowo guiquēnē Wængonguī tōmengä quimō iñōmonte mänīne ante edonque pōni odōmonte apæneca eñēmopma. ²⁷ İninqe mōnitō imōnite äninqe, Waa pōni botō angäine ante mīni waocabo wēēnēñedē mīni eñēnāmaī ingäine ante mīnitō ñowo tæcæ eñēmīni inte oodeoidi ināmaī ināni inānite odōmonte apænemīni eñencæðänimpa, ante Wængonguī cæcampa. Mänōmaī beyæ mänīne ante apænemōni eñēninqe mīni waa pōni ñāo bai entawenguinque eñencæmīnimpa. Edæ, Mīnitō mōnō Codito ingante ewocadinque mīni ñāo emāmōdē æiyōmīni watapæ bacæimpa, ante mōnō pōnēnō ante mänīneque impa.

²⁸ Mōnō Codito tōmengä nänō eñēnō ante entawēninqe mōnitō adocä ingante mōnō

Codito ingante ante apænemönipa. Tömengä nempo quëwëninque mīnitō picænāni bai nē ēñēmīni bayōmīnite Wængonguī mīnitō imīnite waa acæcāimpa, ante mōnitō tōmānāni inānite waadete odōmonte apænemönipa. Ayæ, Ëñenguënë quëwëedāni, ante tōmānāni inānite wææ ante apænemönipa. ²⁹ Mönō Codito nānō tæi piñænō pōnongā ænte entawëninque botō, Nē ēñēmīni bacæmīnimpa, ante cædinque tæi pæ pagænte cōwë nanguī cæbo imopa.

2

¹ Botō mīnitō beyæ nanguī cædinque Daoditea iñōmō quëwënāni beyæ adobai nanguī cæbo aedāni. Ayæ wadāni botō awinca adāmai ināni beyæ adobai tæi pæ pagænte cædinque nanguī cæbopa, ante apænebo ēñeedāni. ² Botō, Tōmānāni wæwënāmai inte wampo pōnëninque godongāmæ waadete pōnëninque adocabodāni bai bacædānimpa, ante ædæmō cæbopa. Edæ, Mänōmai badinque tōmēnāni Codito nānō ēñēnō ædæmō pōni nāni entawenguinque impa, ante pōnëninque cæbopa. Ayæ, Mänōmai badinque tōmēnāni Wængonguī nānō nē wë wodongaingā ingante Codito ingante edonque acædānimpa, ante botō mänōmai beyæ ante ædæmō pōni odōmonte apænebopa. ³ Edæ, Æbānō i, ante, Æbānō waa cæquīi, ante Wængonguinque nānō nō pōnēnō incæ mōnō Codito mäninō tōmānō ante ēñëninque waëmō pōni incoo bai wë wodonte mante bai entawengampa. ⁴ Mänōmainō ante apænedinque botō, Mīnitō oda cædāmai incæmīnimpa, ante yewæmonte apænebopa. Edæ wadāni waa pōni

tededäni incæ babæ wapiticæ odömoncæte ante tededäni inäni adinque eñenämaï iedäni, ante wææ ämopa. ⁵ Edæ wayömo quëwëmo incæ minitö weca owote bai botö önöwoca pönëmopa. Ìninqe botö ayömo minitö mönö Codito ingante wede pönente tæï piñænte ongöninque iñacabo cædinque töngä pöni cæminipa, ante pönëmopa. Mänömaï iminipa, ante ate bai adinque botö nanguï tobopa.

Codito nempo quëwëninque mümö quëwëmompä, ante

⁶ Mänömaï beyæ botö iïmaï ämopa. Minitö Itota Codito ingante mönö Awënë ingante Ao ante do æminitawo. Ìninqe tömengä ingante do Ao ante ænimini inte minitö ñöwo adobaï tömengä ingante cöwë Ao ante tömengä nempo quëwëdäni.

⁷ Minitö waomini incæ awæ tæimöwæ ædæmö guiwate pæwæ bai Codito nempo quëwëninque cöwë godömenque picæmini bacæminimpa. Ayæ mönitö odömonte apænemöni mini eñenö bai cædinque godömenque wede pönëninque tæï piñænte ongödäni. Ayæ Wængongui ingante waa ate pönëninque watapæ apænedäni.

⁸ Wadäni mä pönente önonquedö ante apænedäni eñente wædinque minitö, Mönö imonte ö æncæte ante babæ apænedänipa, äninque wææ cæedäni. Edæ tömënäni dicæ Codito nänö odömonte apænegainö ante apænedäniyaa. Wæætë waodänique nani odömonte apænegainonque ante Ao äninque tömënäni inguipogaque ante në pönënäni nani pönënö bainonque ante cædänipa töö.

⁹ Edæ Wængongui tömengä nänö entawënoncoo incæ mönö Codito Waocä në eñagaingä inongä inte

mānincōo tōmancoo entawēninque nāmā baonga ēñacampa. ¹⁰ Öönädē awēnēidi incæ inguipoga awēnēidi incæ nanguī īnāni īñōnāni mōnō Codito adocanque Ñænængä pōni īnongä inte Tæiyæ Awēnē īnongä ingampa. Incæte tōmengä nempo quēwēmīni inte mīnitō tōmengä nānō entawēnō incæ ædæmō entawēmīnīpa. ¹¹ Īninque tōmengä nempo quēwēninque mīnitō wao ōnompoca ēō togæñāmaī īmīni incæte mōnō Codito īñōmō ēō togænte baī cædinque mīnitō baonque ante mīni wīwa cægāinō ante wido cæcā ate mīnitō tæiyæ waēmō entawente quēwēmīnīpa. ¹² Wængonguī nē tæi pīñænongä inte Itota ingante angä ñāni ōmæmongacäimpa, ante wede pōnēmīni inte mīnitō, Itota tōnō godongämæ nāñe wænte baī imōmpa, ante æpænē guimīnitapa. Ayæ adobaī adocā nē tæi pīñænongä ingante wede pōnēninque mīnitō æpænē guidinque Itota tōnō ñāni ōmæmonte godongämæ tao gongænte quēwēmīnīpa.

¹³ Doyedē ēñēnāmaī cædinque do wænguēnēmīni ingaīmīni inte mīnitō inguipogaque ante mīni cæinēwēnō ante ee mongæñōmīnite Wængonguī angä ate mīnitō Itota tōnō ñāni ōmæmonte quēwengamīnīpa. Edæ wēnæ wēnæ mīni cægāinō ante adinque Wængonguī pōnō ñimpo cæcā quēwēmīnīpa. ¹⁴ Mīnitō pante wæquinque ēñēnāmaī cæmīnīpa, ante Wængonguī wade wade ante wææ angä ēñēninque dodāni adodō adodō ante yewæmōnāni ate wægāmōimpa. Mānōmaī mōnō imonte ancaa wææ ānāni wæmō adinque Codito īñōmō mānīnecōo mōnō wægāinecōo

ante wëä godonte bai cæcä ate dæ batimpa. Edæ awæ timpodäni wæninque Itota Codito mäninö ante do teëmente mongæ mäo wido cægacäimpa. ¹⁵ Ayæ mäniwäa wæninque adocä tæi ëmongä inte wënæidi awënëidi tönö në änäni nani wænonguënencacoo gä pe æmpote ö æninque tömengä, Wænoncaincoo nææminipa wænonguimīni, ante bai wadäni ayönänite badete tote bai cægacäimpa.

Öönædë mönö entawënö ante æncæte ante cæedäni, ante

¹⁶ Mönö ee aquënënö incæ bitö quimæ cæmii, Quimæ bebii, ante pönö apænte pīinte änänitawo. Wængongui beyæ ante ææmæ cæcæimpa, ante apænte ancæ pīinänitawo. Wacä mämö i ate becæimpa, ante wææ änänitawo. Guëmanguïönæ incæ quimæ cæbii, ante mīnitö imīnite apænte pancæ cædänitawo. Edæ æcämenque mänömainö ante apænte ancæ cæyönänite mīnitö wæætë, Tömënanī nāni wææ änīnö ante Codito wëä godonte bai cægacäimpa, ante pönëninque guifente wädämaī incæminimpa. ¹⁷ Cænguī cænte bai bequī bete bai mönö önöwoca beyæ Codito incæ mönö guëmanguimämo bai inongä ingampa. İninque Codito ingante ænte entawëninque mönö æbänö cænte bai guëmante bai quëwenguī, ante odömoncæte ante cædinque dodäni iñömö öwocodenganque odömonte bai cædinque wææ angadänimpa. Mänömaī beyænque tömënanī, İimaī cæedäni, İimaī beedäni, İimaī guëmædäni, ante wææ angadänimpa.

18 Pancadäniya mä pönëninque, Önömonque bai inömö inte mönö anquedoidi inänite waa adinque waa cæcæimpa, ante babæ ante wææ änewënäni. Ayæ mönitö änö bai cædämaï ininque edæ mïnitö ænte entawënö ænämaï inte wæbaïminipa, ante änewëñönäni mïnitö wæætë guñente wædämaï iedäni. Edæ, Mönitö ate bai do adimöni inte ämöni ëñeedäni, ante tömënäni Codito Önöwoca ingante ewocadämaï inäni inte mä pönëninque änewënäni. Edæ, Nämäneque ante pönëninque tömënäni, Mönitö adomönique waa cæmöni imönipa, ante nämä waa adänipa.

19 Mönö ocai encamö inte cænguï cæninque mönö baonga wepæmë tömäo gogadinque pæmompä. Ayæ adobai mönö ocai encadinque oguëmë tönö baö beyæ cöñe pö cöñe pö cæmompä. Mönö pönencabo adobai Codito tönö adoyonque bai inñömonte tömengä Önöncamö bai inongä inte në angä ingampa. Mönö mänömaï imö incæte tömënäni wæætë në Önöncamö bai inongä ingante Baa äninque nämä wido tote wææiñö bai edæ wadæ godänipa. Ininque wææiñö bai inäni incæ mïnitö iminite wææ änäni apa quëwëmïni.

20 Wëenëñedë inguipogaque ante näni wææ angainö ante në ëñengaimini incæte ñöwo wæætë Codito tönö godongämæ wænïmini inte mïnitö wænte bai imini inte mänine ante ædö cæte ëñenguimïni. Inguipogaque quëwëmïni iminipa diyæ mänine ante ëñente cæquënëmïni inguimïni.

21 “Gampodämaï, Yædæ bedämaï, Bæi ongönämaï,” ante tömënäni näni wææ änewënö ante quïnante ëñente cæmïni.

22 Inñæmpä waodänique edæ,

Gampodāmaī, ante nāni ānoncoo iñōmō tæcæ ænte cæyōmīni edæ dobæ wote ba apa eñewēmīni. Inguipogaque quēwēnāni nāni ānewegainō ante eñēnīnque tōmēnāni wææ ānānīpa. Dodāni nāni odōmonte apænegainō ante eñēnīnque wææ ānānīpa. ²³ Tōmēnāni, Ōnōmonque bai inōmō inte mōnō anquedoidi inānite waa adīnque waa cæcæīmpa, ante wææ ānewēnānīpa. Ayæ mā pōnēnīnque, Cædāmaī, Cædāmaī, ante nāmā baō incæ pānānīpa. Īnāni ocai encadōnāni inte wææ ānānīpa, ante pōnēnīnque wadāni edæ wæætē oda cædānīpa. Īñæmpa, Cædāmaī, Cædāmaī, ante nāni wææ ānewēnō wīī eyepæ ī īnīnque nē eñēnāni inguipogaque nāni cæīnēwēnō ante godōmenque wīwa cædānīpa, ante āmo eñēmaīmīnīpa.

3

¹ Īnīnque mōnō Codito nē ñāni ōmæmongaingā tōnō nē ñāni ōmæmongaīmīni inte mīnitō æmōnga ongoncoo edæ æīnente pōnēedāni. Codito ñōwo Mæmpo Wængonguī tōmēmængā īnō æi tæ contate ongongampa, ante pōnēnīnque edæ mīnitō, Æmōnga pōnī nē quēwēngā tōmēngā nānō entawēnō bai adobaī entawēngæīmpa, ante æīnente wædīnque quēwēedāni. ² Inguipogaque mōnō quēwēmāmo ante edæ wædāmaī inte wæætē æmōnga mōnō quēwēnguīnō ante cōwē pōnente quēwēedāni. ³ Edæ do wænte bai ingaīmīni inte mīnitō ñōwo Codito tōnō Wængonguī nempo awēmō quēwēñōmīnite mīnitō quēwēnguīnō ante wīī edonque acæīmpa. ⁴ Mōnō Codito mīnitō quēwēnguīnō ante nē pōnōngaingā inte ponte a

ongöñongä mänñedē tömengä ñäö entawëninque nänö tæi ëmömämodē mīnitö adobaï tömengä tönö a ongömini acæimpa.

Inguipogaque ante wægaïmö inte mönö mümö quëwëmö

⁵ Mänömaï impa, ante wædinque mīnitö inguipogaque ante mīni cæinëwënö ante wænonte bai æmæwo wido cæedäni. Nänöogængä inämaï iñongante godö mönämaï ee aedäni. Wiwa mīni pönëwënö ante æmæwo wido cæedäni. Wacä ingante mīni toïnente wædö ante æmæwo wido cæedäni. Wiwa mīni cæinëwënö ante æmæwo wido cædinque ee ate quëwëedäni. Mīni mäincooque ante æinëwënö ante æmæwo wido cæte ñimpo cæedäni. Edæ mäincoo ante æinente në wæcä iñömö tömengä, Mäincoo incæ botö wængonguï impa, ante bai wæcä apa cæmīni. ⁶ Në ëñënämaï cædäni inguipogaque näni cæinëwënonque ante cæyönänite Wængonguï nänö pīnguimämo oo ponguïnö anguënë. ⁷ Mīnitö incæ doyedë inguipogaque ante quëwëninque adobaï mīni cæinëwënonque ante cægaïmīni imīnīpa. ⁸ Nöwo guiquënë ænguï badämaï iedäni. Äimīni badämaï iedäni. Pīinte cædämaï iedäni. Babæ godö wënæ wënæ änewënämaï iedäni. Wiwa apænedämaï iedäni. Wæætë, Idæwaa wënæ wënæ cæte awædö, ante mäninö tömänö ñimpo cæte ee aedäni. ⁹ Wëenëñedë mīni entawengaïmämo ante wido cædinque mänñedë mīni cægaïnö ante adobaï në wido cædimīni inte ñöwo iñömö edæ wacä ingä wacä ingä babæ wapiticæ apænedämaï iedäni.

10 Wæætē mīimīni edæ quēwencæmīnīmpa, ante Wængonguī do pōnō badongā entawēmīnīpa. Ayæ mānīnō ante nē Badongaingā iñōmō cōwē pōnō odōmonte apæ necā ēñēninque mīnitō mīimīni quēwēmīni inte tōmengā nānō entawēnō baī godōmenque godōmenque adobaī entawēmīni bamīnīpa. 11 Mōnō Codito nempo adoyōmō pōnī inōmō inte mōnō guidiegoidi incæ oodeoidi incæ adomō inōmō imōmpa. Nē ēō togæināni incæ bagādāni incæ adomō inōmō imōmpa. Waodāni incæ cowodēidi incæ adomō inōmō imōmpa. Wacā beyænque nē cæte quēwēnāni incæ abæ tawænte ee gote baī nāmā beyænque nē cæmōni incæ mōnō tōmāmō adomō pōnī inōmō imōmpa. Edæ mōnō tōmāmō Codito adocanque nempo quēwēninque tōmengā adocanque ingante nē ēwocamō imōmpa.

12 Wængonguī, Mīnitō botō quīmīni badinque tæiyæ waēmō bacæmīnīmpa, ante mīnitō imīnite waadete pōnēninque do apænte ængacāīmpa. Īninque tōmengā nānō nē apænte ængāimīni inte mīnitō wadāni inānite waadete pōnente godō waa cæedāni. Nāmā ōnōmoque baī imōpa, ante pōnēedāni. Wadāni inānite ædæmō cæedāni. Æiquedō waa cæquīnāni, ante wædāmaī inte piyænē cæte quēwēedāni. 13 Ayæ wacā nānō cæinēnō ante cæcā adinque mīnitō pīināmaī ee amīni cæcæedāni. Wacā adobaī mīnitō imīnite wīwa cæcā ate wædinque mīnitō godō ñīmpo cæmīni quēwencæcāīmpa. Edæ mōnō imōnte mōnō Awēnē nānō ñīmpo cægāi baī mīnitō adobaī pīināmaī inte godō ñīmpo cæedāni. 14 Ayæ, Adocabomō mōnō baquinque mōnō waadete pōnengæīmpa, ante pōnēninque mīnitō tāno wadāni inānite waadete

pönëningue ayæ tömënäni inänite mïni godömenque cæquënënö ante cæedäni. ¹⁵ Mïnitö adocabomïni badinque piyænë cæte quëwencæmïnimpa, ante Wængonguï mïnitö imïnite aa pegacäimpa cæmïni. Mönö Awënë Codito nänö piyænë cædö pönongä æninque mïnitö piyænë cæte quëwëedäni. Ayæ Wængonguï ingante cöwë waa ate pönente quëwëedäni.

¹⁶ Mönö Codito nänö apænegainö ante ëñëningue mïnitö ædæmö entawëningue nanguï ëñente baedäni. Ìnningue nanguï ëñëmïni badinque mïni cabo incæ wacä ingä wacä ingä godongämæ odömonte apæneedäni. Ayæ nanguï ëñëmïni inte mïnitö wacä ingä wacä ingä waadete pönëningue, Ìimai cæcäimpa, ante apæneedäni. Ayæ dodäni Wængonguï ingante waa adinque ämotamïni ante nani yewæmongainta adinque mïnitö wæætë adodö tee empote äedäni. Ayæ Itota Codito nänö cægäinö ante pönëningue ämotamïni äedäni. Ayæ adobai Wængonguï Önöwoca pönö apænecä ëñente ëwocadinque mïnitö ämotamïni ante adodö tee empote äedäni. Mänömai ämotamïni äninque Wængonguï ingante cöwë waa ate pönëningue äedäni. ¹⁷ Ayæ æbämenque ante apænemïni incæ æbämenque cæmïni incæ mïnitö, Mönö Awënë Itota ëmöwo beyæ impa, ante tömäa cæedäni. Ayæ tömengä pönö cæcä beyænque mïnitö eyepæ inte Mæmpo Wængonguï weca pönningue tömengä ingante waa ate pönëningue apæneedäni.

Mönö godongämæ quëwencabo ïmai cæte quëwengäimpa

18 Onquiyæmīni eñēedāni. Mōnō Awēnē nempo quēwēnque mōnō eñente cæcæimpa, ante wædinque mīnitō nānōogæñāni inānite Ao ante eñente cæedāni. 19 Onguiñæmīni eñēedāni. Mīnitō nānōogæñāni inānite ædæmō waadete pōnēnque tōmēnāni inānite pīinte cædāmaī iedāni.

20 Wēñæmīni eñēedāni. Mīnitō mæmpoidi inānite ædæmō eñente cæedāni. Edæ mānōmaī cæmīni adinque mōnō Awēnē, Waa pōni cæbi abopa, ancæcæimpa. 21 Wæmpomīni eñēedāni. Mīnitō, Ancaa āmo bai botō wēñængā ænguī badinque guingo imonte wæquēnengā, ante pōnente wædinque wæætē wēñænāni inānite nanguī ānāmaī inte waadete pōnō cæedāni.

22 Wacā nānō nē ö ænimīni inte tōmengā beyænque nē cæte quēwēmīni iñōmō eñēedāni. Mīnitō imīnite nē ö ængaingā ingante nē cæmīni inte mīnitō tōmengā nānō ā bai tōmāā eñente cæedāni. Edæ, Awēnē Wængonguī incæ botō imote cōwē acampa diyæ, ante guīñente wædinque mīnitō imīnite nē ö ængaingā nānō ayedē incæ tōmengā nānō adāmaī iñedē incæ cōwē eñente cæedāni. Waodānique botō imote waa acædānimpa, ante pōnēnāmaī inte mīnitō nō pōnēnque cōwē eñente cæedāni. 23 Æbāmenque cædinque mīnitō, Wīi waocā beyænque ante cædinque botō Wængonguī Awēnē beyænque ante cæcæboimpa, ante pōnēnque tæi ewocadinque ee cæedāni.

24 Mōnō Awēnē iñōmō tōmengā do nānō angainō bai cædinque mīnitō cægainō beyæ ante eyepæ pōni pōnongā æncæmīnimpa. Mānōmainō ante pōnente cæedāni. Edæ, Mōnō Awēnē Codito ingante adocanque ingante nē cæmīni imīnipa,

ante ämo eñëmaimīnīpa. ²⁵ Nē wēnæ wēnæ cæcä
 guiquēnē tōmēngä nänō wēnæ wēnæ cægainganca
 eyepæ æncæcäimpa. Edæ Wængonguī iñōmō wacä
 ingante wadō wacä ingante wadō ate pōnēnāmaī
 inte tōmāmō imonte apænte äninque pōnō nō pōnī
 paga cæcæcäimpa.

4

¹ Awēnēidi eñēedāni. Mīnitō waocä ingante nē ö
 ænimīni inte eñēedāni ämopa. Edæ mīnitō Awēnēidi
 imīni bai mīnitō imīnite nē Ængaingä incæ adobaī
 mīnitō Awēnē inongä inte öönædē quēwēngampa
 cæmīni. Mīnitō beyænque cæte nē quēwēnāni
 inānite mīnitō nōingä cædinque tōmēnāni nāni
 ænguēnēnō ante adinque eyepæ pædæ godōmīni
 æncædänīpa.

² Wængonguī ingante cōwē apænedinque,
 Tōmēngä æbänō cæcää, ante cōwä adinque
 tōmēngä ingante waa ate pōnēninque apæneedāni.

³ Codito æbänō cæcää, ante dodāni nāni
 eñēnāmaī ingaine incæ botō mänīne ante do
 eñēnīmo inte apænebo beyænque botō imote
 tee mönedāni wæbopa. Incæte mönitō mänīne
 ante apæneyōmöni mīnitō wæætē mönitō beyæ
 ante Wængonguī ingante apænedinque iīmaī
 ante apæneedāni ämopa. Wængonguī eñēmi.
 Bitō wi ænete bai cæbi ate Pabodoidi nāni
 apænede wadāni mīmōnē guicæimpa, ante
 apæneedāni.

⁴ Codito æbänō cæcää, ante
 botō edonque apænequēnēmo imopa. Ininque
 mīnitō botō beyæ ante apænedinque, Pabodo
 edonque apænecæcäimpa, ante Wængonguī
 ingante apæneedāni ämopa. ⁵ Wadāni inānite

bee tēninque mīnitō ocai encamīni inte ēñente cæedāni. Pōnēnāmai ināni do ēñencædānimpa, ante waa apænete cæedāni. ⁶ Ayæ Wængonguī waadete pōnō apænecā ēñēninque mīnitō adobaī wadāni inānite waadete pōnō apænedinque waa pōnī apæneedāni. Wadāni, Æbānō īi, ante ēñencæte ante wæyōnānite mīnitō wæætē nō pōnī ēñēmīni inte nōingā apænemīni ēñencædānimpa.

Waa quēwencæminimpa, ānānipa

⁷ Botō Pabodobo æbānō quēwēmoo, ante nē ēñēningā inte Tiquico ñōwo mīnitō weca pōninque mānīnō ante apænecā ēñencæminimpa. Tōmengā mōnō tōññacā bai īñongante mōnitō tōmengā ingante waa waadete pōnēmōnipa. Tōmengā mōnō Awēnē nempo quēwēninque mōnitō tōnō godongāmæ cæcā inongā inte mōnō pōnencabo tōmāmō imonte pōnēninque mōnō beyæ cōwē ædæmō cæcā ingampa. ⁸ Mīnitō, Pabodoidi æbānō quēwēnānīi, ante ēñencæte ante wæmīnitawo. Edæ, Tiquico mānīnō ante apænedinque mīnitō imīnite ædæmō apænecā ēñēninque mīnitō wampo pōnencæminimpa, ante cædinque botō ñōwo tōmengā ingante mīnitō weca da godōmo pongā aedāni. ⁹ Tiquico goyongā tōmengā tōnō Ōnetīmo mīni cabo nē inongā incæ guēa gocæcāimpa. Ōnetīmo cōwē ædæmō cæte nē pōnengā ingampa, ante adinque mōnitō tōmengā ingante waadete pōnēmōnipa. Īninque tōmēna īñōmō, Pabodoidi weca æbānō cædānīi, ante tōmānō ante apæneda ēñencæminimpa.

¹⁰ Botō tōnō guēa tee mōnete ongongā Aditadoco īñōmō tōmengā mīnitō imīnite, Waa quēwēedāni,

angampa. Ayæ Bedēnabee nānō wænquicā Māadoco adobaī, Waa quēwencæminimpa, angampa. Tōmengā ingante æbānō waa cæquīī, ante do āmo ēñēmīnitapa. Īnque tōmengā pongā adinque waa cæedāni. ¹¹ Ayæ wacā Itota Yoto nāni ānongā adobaī, Waa quēwencæminimpa, angampa. Botō Wængonguī Awēnē Odeye nempo quēwēnāni beyæ cæyōmo oodeoidi incæ wadāni cædāmaī īñōnānite mānīnānique botō tōnō godongāmæ cædinque pōnō ædæmō cædāni ænīnque botō wampo pōnentabopa.

¹² Ayæ mīni cabo īnongā inte Epapada īñōmō tōmengā Itota Codito ingante nē cædongā inte adobaī, Waa quēwēedāni, angampa. Tōmengā Wængonguī ingante nanguī apænedinque, Codotenteidi īnānite bitō godō cæbi ate tōmēnāni picæñāni baī bacædānimpa. Ayæ bitō angainō tōmānō ante ēñente cædāni inte tōmēnāni tæī piñænte ēwocacædānimpa, ante tōmengā mīnitō beyæ ante cōwē apænecampa. ¹³ Mīnitō beyæ tōmengā nanguī cæcampa. Daoditea īñōmō nāni pōnencabo beyæ adobaī Yedapodi īñōmō nāni pōnencabo beyæ adobaī tōmengā nanguī cæcampa, ante botō nāwangā apænebo ēñēedāni. ¹⁴ Ayæ, Waa bacædānimpa, ante mōnō nē cædongā tōmengā emōwo Odoca tōmengā īñōmō mōnō nē waadecā ingampa. Tōmengā tōnō Deēma, Waa quēwencæminimpa, ante adobaī ānapa. ¹⁵ Ayæ botō Pabodobo beyæ ante wæætē Daoditea īñōmō mōnō tōniñadāni īnānite mīnitō, Waa quēwēedāni, æedāni. Diimpa īnante, Waa quēwēedā, æedāni. Ayæ Codito ingante nāni pōnencabo tōmēnā oncōnē godongāmæ ponte apæneyōnānite mīnitō

wæætē botō beyæ apænedinque, Pabodo, Waa quēwēedāni, angampa, æedāni.

¹⁶ Ayæ iinta botō cadota ante yewæmōinta iinque adinque mīnitō, Daoditea iñōmō Codito ingante nāni godongāmæ pōnencabo adobaī acædānimpa, ante cædinque da godōmīni ænte acædānimpa. Ayæ daoditeaidi iñānite botō cadota ante yewæmōninta adobaī āmīni da pōnōnāni æninque aedāni.

¹⁷ Ayæ Adoquipo ingante apænedinque, Bitō mōnō Awēnē pōnō angā ēñēnīmi inte bitō cæquēnēnō ante tōmāā ædæmō cæe, æedāni. ¹⁸ Botō Pabodobo tōmēmo ōnompoca yewæmōninque, Waa quēwēedāni, ante tōmēmo ēmōwo ante yewæmōmopa. Botō æbānō yæguincamē encapote wæboī, ante pōnēninque mīnitō Wængonguī ingante apæneedāni āmopa. Wængonguī waadete nānō pōnō cædō ænte entawencæmīnimpa, ante māninque ante yewæmōmopa.

Wængonguï nänö Apænegainö
New Testament in Waorani (EC:auc:Waorani)

copyright © 2009 Wycliffe Bible Translators, Inc.

Language: Waorani

Translation by: Wycliffe Bible Translators, Inc.

Waorani [auc], Ecuador

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Waorani

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

9bedab5a-39ff-5163-a35b-8056cbbe8690